

Date – 30/12/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Governor thar General Vijay Kumar Singh-a chu kumthar January ni 9 ah Raj Bhavan-ah rinawmna thutiamtira lakluh a ni ang.
2. Mizoram Pradesh Congress Committee kaihhruiin Aizawlah Dr Manmohan Singh-a sunna hun vawiin khan hman a ni.
3. Zanin hian Indian Space Research Organization (ISRO) chuan SpaDex mission vuahin thlalem a kapchhuak dawn.
4. US President hlui Jimmy Carter chu kum 100 mi niin a thi.

<><><>

NEW GUV

Governor thar General (Dr.) Vijay Kumar Singh-a chu kumthar January ni 9 ah Raj Bhavan-ah rinawmna thutiamtira lakluh a ni ang.

Governor thar lakluh dan tur hi vawiin khan Chief Secretary Pu Khilli Ram Meena hovin CS Conference Hall, MINECO-ah rel a ni a, Governor thar tur hi January ni 8-ah Aizawl a lo thleng anga, a tuk January ni 9-ah Mizoram Governor atan lakluh a ni ang.

Governor thar tur hi Chief Minister hovin Minister ruatte leh Official pawimawh engemawzatten Lengpui Airport-ah an hmuak ang a. National Salute leh National Anthem te nen dawnsawn a nih hnuah Raj Bhawan panpui nghal a ni ang.

Governor thar tur hi Chief Justice of Gauhati High Court-in a lalut dawn a ni.

He hunah hian Chief Minister, Council of Ministers, Speaker, Dy. Speaker, Mizoram MP te pahnih leh Officials pawimawhte bakah sawm bikte tel kim thei tura beisei an ni bawk.

Puan tawh thin angin Odhisa larsap Raghubar Das banna President Droupadi Murmu-i'n a pawm tak avangin Thawhlehi kal ta tlai lamah khan state thenkhat a larsapte awmna siksawi a ni a. Mizoram larsap thar atana ruat General Vijay Kumar Singh hi India ram sipai lal ber (Chief of Army Staff) 24-na a ni a, Indian Army atanga a chawlh hnuah Politics-ah a lut a, kum 2014 leh 2019 Lok Sabha Inthlanpuahte khan BJP ticket-a dingin Ghaziabad, Uttar Pradesh atanga thlan tlin a ni a. Prime Minister Pu Narendra Modi kaihhrui term khatnaah khan Minister of State for External Affairs, Minister of State (Independent Charge) for DoNER leh Minister of State for Statistics and Programme Implementation-te a chelh a. A term hnihnaah khan Minister of State for Road Transport and Highways leh Civil Aviation-te a lo chelh tawh bawk.

<><><>

NEW YEAR PREP

Kumhlui thlaha kumthar lawm turin state mipuite ngawrh takin an inpuahchah chho mek zel a. Kumin atana Thawhtanni hnuhnung berah sorkar pisa te chu dan pangngaiin a inhawng a, sumdawna hmun te pawh an inhawng deuh vek a ni.

Aizawl khawchhung hmun hrang hrang tlawhtu kan corr chuan Aizawl dawrkai pakhat chuan Pawisa a vang tih thawm a tam thu sawiin inhralh pawh kumin hian a harsa zuala an hriat thu a sawi a, mipui chhuak vak erawh kum dang ang tho a an tam thu leh mipui vei vak hrim hrim thil lei ni lemlo an tam nia a hriat thu a sawi.

Kum 2024 chhunga Sorkar pisa kai tawp ber ni a nih angin Lungleiah chuan Sorkar hnathawk te pawhin Pisa an kai a, KAI APPs hman anih tawh avangin Sorkar hnathawk te kum dang zawng aiin an kal tha tih kan corr chuan sawi a. Lunglei DC Pi Navneet Maan pawh Lungleiah awmin a ho in DC Office pawh dan pangngaiin an kal a ni. Hetihlai hian Deptt Head thenkhat mahni khua a Kum thar ni hmang tur a haw an awm nual ani.

Nitin khawsakna lamah PHE pawhin Dec. ni 20 atang khan nitin darkar 24 chhung Tui an pump thei a, Mizoramah anni anga tui pump thei an awm lo niin PHE Deptt .hotu te chuan an sawi a, Tui pump nan P&E Deptt lamin power an pek that vang niin an sawi.

Khualzin phur Maxi cab service pawh dan pangngai a tlanin sumdawna hmun dawr te pawh an in hawng tha. Sumdawng bungraw zuar tam tak te erawhin kum dang aiin an hralh thalo niin an sawi a, NREGS awm tawh loh vang ni a an hriat thu an sawi ber.

Hetihlai hian Assam Rifles ten Sethlun Helipad-ah mipui tan intihhlimna siamin kumdang ang bawkin Kristmas Arsi lem lian tak an tar a, thalai leh chhungkua ten tlawhin an hlut hle. Police, Excise leh Fire & Emergency deptt. lam pawh an duty tha a, vengtinah YMA/VDP ten tawiaawmin theih ang tawkin mipui him nan hna an thawk mek.

<><><>

MPCC

Mizoram Pradesh Congress Committee kaihhruiin Lal Thanhawla Auditorium ah Dr Manmohan Singh a sunna hun vawiin khan hman a ni a.

He hunah hian Congress Working Committee Member, Chief Minister hlui Pu Lal Thanhawla chuan Dr Manmohan Singh sunna thu a sawi a, Dr Singh-a chuan Mizoram tum 5 a tlawh ni a sawiin, November 2008 ah campaign turin a rawn kal a, kum 2013 November thla vek khan campaign turin a rawn kal leh a ni, a ti a. Hetiang mi ropui, Mizoram pawh hria, rawn tlawh ve zeuh zeuh thin leh rawn duhsaktu chan a ni ta mai chu a vanduaithlak hle a ni a ti.

Dr Manmohan Singh-a chuan Anti-Terror Law tam tak a siam a, India ramah thisen chhuahna thleng nasa lutuk chu Congress sorkar laiin tihreh a ni thin a, a bultumtute an fakawm thin a ni a ti a ni.

Dr Manmohan Singh chu India ram economy chawi sangtu a ni a ti a, tun thlenga Mizo mipuiten an chhawr tangkai em em MGNREGS leh RTI te a hunlaia duan chhuah niin a bultumtu a ni a ti bawk.

He hunah hian MPCC President, Pu Lal Thanzara chuan Dr. Manmohan Singh te chhungkua chu inngaitlawm tak an ni chu an entawn tlak hle a ni, a ti a. Mizoramah Dr. Manmohan Singh-a sunna neih hi tul an tih thu leh state kilkhawr tak hmangaihtu chàn a ni chu a uiawm hle a, channa nasa tak a ni a ti.

Economist ropui, iIndia ram sum leh pai dinhmun siamtha tu a ni thu leh Mizoram pawh a duhsakin Planning Commission a awm lai pawha special package hmanga NLUP atana cheng vbc 2800 petu a nih thu a sawi a ni.

Sunna hun hi MPCC Vice President Pu RL Valla'n a kaihruai a, Pu Ronald Sapa Tlau chuan Dr. Manmohan Singh chanchin a sawi a, sunna hunah hian kalkhawm an thahnem hle a ni.

Puan tawh thin angin Dr Manmohan Singh hi Kum 92 mi niin Dec 26 zan dar 9 leh min 51 khan New Delhi AIIMS ah a thi a. Amah sunna hun hi ram pumah ni 7 chhung January ni 1 thleng neih a ni dawn a ni.

<><><>

FIRECRACKERS

Kumhlui thlah zana halpuah leh halmawi lam chi hal lo tura khauh taka thupek sorkarin a chhuah hnuah, cheng nuai 23 chuang hu halpuah leh halmawi te man a ni tawh.

Kan corr thudawn danin, Aizawl District ah tun thlengin hemi kaihnawihah hian thubuai 10 ziahluh a ni tawh a, dan bawhchhia mi 13 man an ni tawh bawh a, Police ten halpuah leh halmawi an man tawh zat hi cheng nuai 23, sing 1 sang 5 & 135 a tling a ni.

Nizan khan Aizawl PS staff te chuan an thudawn bawhzuiin Aizawl Bethlehem Vengthlanga chenna in pakhat an dapnaah halpuah leh halmawi cheng sing 4 & 4506 man an man a, he in neitu C Lalbiakfela kum 39 mi man nghal a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in-ah te, chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

CHHINGCHHIP

Vawiin khan Chhingchhip Mualpui nu pakhat Truck chil nia hriatin a thi.

Vawiin dar 9:30 vel khan Chhingchhip Mualpui a mi, Pi Lalduhsangi kum 25 Pu Lalrintluanga nupui chu Chhiahtlang atanga hmar lam KM khat vel, Paihte lui bul kawngsirah, a kawng leh tái vela hliam na tak tuarin thi chhàwnga hmuh a ni a, Serchhip Damdawi in panpui a nih hnuah vawiin chawhma dar 11:30 vel khan a hliam tuar lovin a thi.

Pi Laldusangi te hi kum 2020 a innei, fa pakhat nei a sîn tawh an ni a. A pasal nen a nu leh Pa te awmna Chhiahtlang Chhim vengah kumthar hmang tûrin 2-wheeler in an kal a. An bag an thlah avângin a pasal hi amahin a tlân lêt leh a, chutia a thang chung chuan Pi Laldusangi hi hliampui tuar, biak hleih theih lovin a lo awm a. A hlim chhàwnah thil awmzia an zawh pawhin engmah a hriat loh thuin a chhang a ni.

Mi tlawm ngai ten hliam hi bawihsâwmin, Police ah report vat a ni a. A chiltu nia rinhlelh hnam dang motor lian pahnih, Serchhip chhim lam kawt chhuahah Police duty ten lo tidingin, hêng Truck, oil phur chi khalhtute hi an tlanbo nia hriat a ni a, police ten thil ÷ul hrang hrang an buaipui mek a ni.

<><><>

REFUGEE AID LAWNGTLAI

Sorkar laipuiin Raltlante tana a thlawna semtur Buhfai, Mizoram Sorkar a pek atangin Lawngtlai District ah Buhfai Quintal 2526 sem a ni.

Lawngtlai DC, Pu Cheemala Siva Gopal Reddy-an Akshvani corr a hrilhdanin Lawngtlai District ah Myanmar leh Bangladesh atanga Raltlan awmte hnen ah Buhfai hi Quintal 2526 a thlawnin pekchhuah a ni a, mipakhat tan KG 31.5 pek niin, a thlawna Buhfai sem dawngtu hi an vaiin mi 8020 an ni.

Kumin November 11 khan Lawngtlai DC Pu Cheemala Siva Gopal Reddy hovin Raltlante hnena a thlawna Buhfai semchhuah bultanna hi Kanaan Refugee Camp, Chandmary, Lawngtlai ah neih a ni a, hemi hnu ah a remchandan angin semchhuah nghal ani.

Sorkar in an harsatna hriaa, a thlawna Buhfai a pe chu Raltlante chuan lawmawm an tih thu an sawi a, an belh khuate leh District mipui, Kohhran leh Tlawmngaipawl ten an chhawmdawl thinna ah lawmthu an sawi.

<><><>

ISRO TO LAUNCH TWO SATELLITES FROM SRIHARIKOTA TONIGHT TO DEMONSTRATE DOCKING AND UNDOCKING OF SPACECRAFT IN ORBIT

Zanin hian Indian Space Research Organization (ISRO) chuan SpaDex mission vuahin thlalem a kapchhuak leh dawn ta.

Thlalem hi Andhra Pradesh-a thlalem an kahchhuahna thin Sriharikota atangin an kapchhuak dawn a. PSLV C60 rocket chuan a dawm chho leh dawn a ni. Thlalem an kahchhuah tur pakhat SDX01 chu a hmingah Umtu (Chaser) an vuah a, a pakhat zawk SDX02 chu Saitum (Target) an vuah bawk a ni. Heng thlalem pahnihte hian lei atanga kilometer 470-a hlaa dahin degree 55-a awn chungin ni 66 chung lei an hel dawn a ni. Heng thlalem pahnihte hi kilometer 10 atanga 20 inkar hlat vela awmin an zingkawng thuhmunah an in-um dawn a ni.

He thlalem pahnih kahchhuah tur hi India-in ama puala thlaa inkahkai a tumna tura kawng sialtu tur a ni.

<><><>

FORMER US PRESIDENT JIMMY CARTER PASSES AWAY IN PLAINS, GEORGIA

Nizan khan US President hlui Jimmy Carter chu Georgia, Plains-a an chenna inah a thi a, kum 100 a ni.

US President ni tawh dam lai zinga upa ber ni thin Jimmy Carter hi US President zinga India rawn zin tawh 3-na a ni.

Jimmy Carter-a hian vun cancer a nei a, chumi zung zam chuan a thin leh thluakah bawk a siam bawk a ni. Engemaw chen atang khan damdawi lama inenkawlna titawpin a chenna inah enkawl zui a ni. A thih thu hi Atlanta-a Carter Center atangin puan a ni.

Jimmy Carter hian Democrat party atangin term 1, kum 1977 leh 1981 inkar khan US President hna a chelh a. Kum 2002 khan Nobel Peace Prize hlan a ni.

<><><>